

通城縣志卷十八

藝文

記 碑 跋 引 傳 議 詩

楚人嫻於文其素也而宦遊名公間有記傳詩詞皆足以登大雅之堂而備輶軒之採雖未獲窺全豹而吉光片羽希世所珍謹錄而誌之

資深堂記

黃山谷

通城縣學宮資深堂前縣治臨川鄒君餘損道之所作也通城故崇陽之聚也民病於隸崇陽求專達於武昌故熙甯五年詔割崇陽之三鄉爲通城縣以六

通城縣志

卷十八 藝文

一

安曹君登子漸爲令爲吏嚴能知所先後其作邑民勸趨之官府足以鳩民則致力於學宮因其溪山之陽作夫子廟爰及諸生舍以待其秀民興焉未遑教事而曹君去由是閱數令方貸民出子錢併役兼任而藏其僱傭之奇以爲最歲上丁釋奠府吏執事趨如今則止及令東平王君定民佐時之才病其邑子之不學頗理曹君之緒執經以待問而士不至雖然曹君之功不遂隳亦王君之力也鄒君始下車聞艾城戴君輿耆艾有德而明經術以書幣聘焉戴君至

而士大夫有所矜式鄒君曰講堂者利於羣居而不  
利於燕居使賢者退而與諸生雜處吾懼賢者之不  
安席也乃因民之餘力而作斯堂於是投耒耜而挾  
書棄惰遊而受業日至焉頃之夙夜於其家者知貴  
老出入於其鄉者知尙齒於市於田見儒衣者皆肅  
然父老乃相與嘆曰毀我財而成我子弟勞我力而  
逸我耆老蓋學之功也繼鄒君者臨川吳君履中與  
權吳君發政甚愛民而論政先養士其獄犴平矣曰  
此俗吏之所能也於是復以書幣聘海昏李君亮采

## 通城縣志

卷十八

藝文

二

李君應之則與李君分職曰子典其教事而我知其  
政李君力學以待舉修己以致人士皆樂好之吳君  
公事退則來燕於堂左經右律靡日不勤凡宮室不  
能風雨器用不可薦羞皆彌縫補苴使無憾於是通  
城之學可以責士之不來而士得師友並興於學矣  
夫性者民所自有也彼其怙富滅德放貧爲濫強有  
力囂柔良者不立豈獨民之罪哉長上不勸學也今  
自曹君以來有勸學之心而猶待四人然後其政行  
善政之難也如此夫昔者鄒君甚愛斯堂嘗以書抵

京師求予記之會予不暇及是吳君爲之請焉予謂  
鄒君者名斯堂不空語諸生從事焉不可不知也淺  
聞寡見者不能引之至於道故學者皆得一而曖昧  
彼其得一也非自得之故也孟子曰君子深造之以  
道欲其自得之也見異端而弗畔居之不安也趨下  
流而失其本資之不深也今夫水決之東則東流決  
之西則西流背源而往矣左之右之而常逢其源亦  
必有道矣夫教者欲速效而不使人自得之學者欲  
速化而不求自得之皆孟子之罪人也故表彰鄒君

## 通城縣志

卷十八

藝文

三

之意以曉諸生若夫挈楹計工述其襟帶溪山之觀  
則非兩令之屬予者故不書

宋方瓊忠廟碑

建炎二年

邑侯

尹仲

自乾坤定位而倫常以立五倫之中君臣爲大父子  
爲親爲臣死忠爲子死孝死固當然也如我本朝金  
寇橫逆社稷有累卵之危生靈有倒懸之急凡爲臣  
子者無不奮勇爭先願繫逆賊之頸食肉寢皮而甘  
心者也瓊公居其間忠蓋目守力戰勦賊不意我軍  
失利皇上北轅公遂捐生赴難迄今想見其精忠之  
節動搖山嶽剛大之氣凌逼雲霄豈偷生苟祿之流  
所可倫乎賜之廟祀血食萬世本朝報公之德不爲

# 通城縣志

卷十八

藝文

四

不厚其亘古綱常君臣大義公之扶持亦不爲小矣  
是爲記

社稷壇記

元大德七年

江南北道肅政廉訪使

程文海

社稷郡邑通祀也而或廢不立立或不式余乘軺行春武昌境中見其具且如式者無幾耳蓋推之自郡始繼而咸以維新告通城與焉予或記或否者顧吏民有請有不請也越二年秋文海以公事至其邑邑長以治中好學而文請記其事治中議以諉余余謂治中曰民人社稷天子受之於天以授於下而分理者知一而不知二或併忘而遂怠且虛之可乎夫民爲神之主神依人而祀祀固不可廢也政亦不可慢

# 通城縣志

卷十八

藝文

五

也至治馨香感於神明之謂何蓋民爲貴社稷次之荷任其寄者皆不可不知也吾之所能言者治中亦能言之治中曰公之言我心也請以爲記治中名察罕甲居白雲中號曰白雲其邑長前曰衛良弼後曰韓玉縣尉張思祖

開創縣治記

明洪武  
己酉年

武昌府儒  
學教授 劉賢

鄂介江南要區屬邑曰通城距郡五百里昔爲通城鎮屬唐年縣宋熙甯五年陞爲縣東挹黃龍幕阜之奇西聯衡嶽洞庭之勝銀麓在前雋水在後長江坦如平壤曠如衣冠文物爲他邑稱元失其馭四海鼎沸苗兵往來屯駐殺人而食撤廬以爨民之逃徙十將八九水火之厄可勝言哉聖神受命應天順人削平僭亂整理郡縣乙巳夏永陽馬極來知縣事始至剪荆棘焚蓄翳夷道塗攘除奸宄撫輯遺黎宣布德

## 通城縣志

卷十八

藝文

六

意申飭憲章未幾逃徙者咸復其業慕化者襁負而至田野以闢戶口以增中澤之雁不鳴四郊之犬不驚逾年政治大行境內乂安迺度田正戶均征役擯浮費愛養民力旣庶而富旣富而教絃誦之聲相傳禮義之俗已興一旦環視廨宇慨然曰茲邑之廢久矣曾卑陋而可爲政乎先務之急莫有甚於此者夙夜孜孜載謀載治刊山伐木諏吉召工或良材是斷或隙宇是遷爲屋三十餘間端大堅緻洞達軒豁署事有廳分憲有司吏牘有房禁鼓有樓黜陟塗墍墨

繩以法又懼斯文遺墜大建孔子殿庭上下尋尺視昔無比三皇社稷秩祀之神皆復廟貌關渡橋梁道里郵傳靡不完理上官嘉之旁邑效之邑之士民廖王等狀其事請爲文以垂無窮余嘗奉明詔布告多方由南嘉沂萑川歷崇陽入其境野無惰農耕桑晏然入其邑民物熙熙升田不譁履其庭胥執役勤吏奉法謹凡所創置修飭文質得宜左顧則黌宮巖巖聖道以尊右瞻則新廟翼翼神祇以妥噫觀馬極之爲政足徵士民之所請不誣也極和緩直方廉達明敏嘗從上征伐合符徵兵遵旨柔遠人董功作給餽餉以功授甯國丞時僚佐令長咸以罪廢去極蒞事四年績書上考他日理大府典名藩等而上之功業未易量也姑述其概以副士民之所請云

通城縣志

卷十八

藝文

七

重修儒學記

教諭 徐應斗

通城縣學創自明朝乙巳夏令尹永陽馬極來知是  
邑公勤廉介下車之始瞻顧左右訪儒學謁

先聖耆民答毀於寇竦然驚曰學校風化所關歷代所崇  
虞有上庠下庠夏有東序西序周之世左右有學東  
有膠西有庠王宮國都以及里巷莫不有學明人倫  
育人才淑人心治隆俗美千載不磨恭惟皇上受命  
法古爲治一郡一邑莫不立學通城爲武昌望邑建  
學校施教化誠縣令首務也吾甯緩乎甫期年察天

通城縣志

卷十八

藝文

八

文披地圖相地一區違縣東十餘步水遶山迴四獸  
拱伏正聖哲之所居賢人君子會萃之所也卽定厥  
址捐俸勸貸不逾月木植瓦片胥辦度地取中首建  
聖殿高三丈五尺深廣四丈有奇丹青耀日棟宇連雲前  
創櫺星門戟門間計以三翼以東西廊廡數各如之  
後創明倫堂饌堂各三間東西衛以齋舍東曰進德  
西曰修業旣而神廚庫房射圃豎亭出入廠門崑崑  
峩峩煥然鼎新厥功告成師生日相與講道論德於  
堂微者顯幽者闡人人知父子之有親君臣之有義

夫婦之有別長幼之有序朋友之有信斯道大明民風丕美隆古未之有也凡士之得遊於門者豈特旅進旅退而已哉由鄉舉膺拔擢歷職憲府黼黻皇猷若汪茂實輩胥此焉出猗歟盛哉歲月云邁殿宇剝落堂舍頽傾師生無復講道之處永樂辛卯令尹曹原昇承命蒞任崇儒重道復諭工修葺生徒得盡講學之功歷甲辰登黃甲豸冠象簡鵠立朝端若劉士昌亦從茲而出學校爲之再盛矣自茲厥後涵濡積累人材之盛濟濟彬彬後先相繼風俗之美稱爲醕

## 通城縣志

卷十八

藝文

九

龐學校關係豈小補云乎哉余典教茲庠諸生范純楊懋請言以識往事輒令二生詢於邑之耆民陳文貴具得始末之蹟因書以垂不朽云

重修縣治記

明訓 黃裳 導

通城縣治創自國初制度規模久而漸壞百餘年來  
未有緝而新焉者今上卽位改元成化大計天下吏  
黜故更新而杜侯敏至侯霸州人而豪傑者也由太  
學事內府諳練世故久矣令通一載政務舉興民以  
和甯乃議修縣治增所未備僚以下咸贊之於是隨  
宜設材不取於民量力致工罔勞於眾不數旬材木  
山積工役子來有莫知其所所以然者期月而後堂五  
間成架步如法穿堂四間成裁就有體皆板以覆椽

通城縣志

卷十八

藝文

十

泥以乘瓦堅固縝密用爲退思之所曹司後周爲垣  
高尋尺許以嚴關防二門側緝兩翼舍各爲小門以  
謹出入鐘鼓則爲京觀而內之左右立榜房各九間  
張成憲以示勸懲街衢則甃之以石對待立長竿數  
十遇恩慶以懸綵坊巷要衝立巡舖警更點慎火盜  
也作土磚砌東西南北城門爲保障加屋其上以達  
遠望舉凡學校壇廟寺觀橋梁靡不煥然改觀告成  
之日遐邇聚集咸謂縣治維新足副朝廷寄命之意  
不有記何以傳永久乎隨請於余余謂世之位通顯

食厚祿者意在金紫侯之廉介清如水斷決平如衡  
慎重有德後必有書之循良傳者余不及詳也獨喜  
有益縣治故記之以貽將來云

通城縣志

卷十八

藝文

十一

重修城隍祠記

明景泰壬申

邑貢

郭文質

山陰訓導

城隍神靈之赫濯者也有國家者甯不廟食以祀之  
記曰聖王之制祭祀也法施於民則祀之以死勤事  
則祀之以勞定國則祀之能禦大灾捍大患則祀之  
我太祖高皇帝膺天明命奄有四海敬禮神明故內  
而京都外而郡縣皆立城隍致祀焉蓋欲其捍禦灾  
虞而默相乎國家也通城素稱望邑山高如城川深  
如隍惟高惟深惟神聰明正直德崇而利溥洪武己  
酉上嘉其功特賜爲監察司民城隍顯佑伯以主斯

## 通城縣志

卷十八

藝文

十二

土先乙巳夏永陽馬極來知縣事大建祠宇於縣治  
之西南百步祠南向廊分左右儀門大門翬飛於前  
過堂寢室踵接於後仞牆周繚岌然偉觀自是以往  
風雨摧射祠宇傾塌越宣德辛亥蜀川楊侯來職司  
土克禮於神而神亦爲之庇焉善教洋溢四達絃誦  
合邑耆舊咸以德政請留藩臬俱聞賜勅褒嘉復任  
斯邑往來三十餘年政治馨香皆神之貺也景泰辛  
未將乞骸歸鄉迺鳩工率眾鼎新其祠繪以華藻賢

侯之功蔑以加矣又捐貲造龕塑神驥列於門之左  
右威儀壯觀視他邑蓋未有方於此者噫神之所以  
爲神貴於正直斯能效靈而致敬於人則夫馬侯楊  
侯恪恭乃心而後先創葺祠宇神之爲德其盛矣乎  
尙冀神靈不昧俾合邑之民家給人足永無禍患之  
慮凡所倚仗神其相諸夫楊侯造福於民而盡敬於  
神幽明之績可無以紀之乎乃因耆舊辜得盛之請  
書此以誌可久云

通城縣志

卷十八

藝文

十三

創建學田記

教諭 徐應斗

粵稽

聖制廣厲學宮作興文學意何蒸蒸厚哉既復其身家矣  
又養以餼廩督以齋號懸賞以優文稽行以考德凡  
可作善良而寓振勸者何不用也乃守茲土者更推  
廣德意設處租課以覃及餼廩所未周貧窶之無資  
者宜乎文教之日隆矣不佞歷覽楚志有學有田在  
處皆然獨通爲缺典楊侯蒞通三載諸凡修舉振興  
敦崇文學者無不備至乃悵然於學田之獨缺也爲

通城縣志

卷十八

藝文

十四

捐俸薪置買田若干畝歲出租若干石給付學宮以  
爲多士裨助此其嘉惠盛心直傳之世世無窮極甯  
止一時之惠愛已乎爾多士列在膠庠承茲殊渥宜  
何如以副之不佞叨領庠校躬逢盛美且樂觀其成  
爲立收給定法勒註成冊傳之後來庶隱匿侵漁之  
竇無自而開侯之惠典永垂有實賴矣用掇數語於  
冊首以識不朽云

便民倉記

教諭 徐應斗

長人者而欲有所建豎於民也必有惠愛實心經久遠慮又不憚勤動之勞而後可善其利於不窮通阻山谿之險額運南兌二糧四千二百有奇每歲輪甲收解倉屯船運用耗不貲至每石派銀四兩費且十倍正項楊侯蒞通咨訪利害之端而首及此大爲痛心今年春爲民慮永久規便宜鳩材庀工較水陸遠近於星礪舖所建倉一座分間爲十一度深絜廣儲貯運可四千正啟廳堂傍翼兩舍列張門甬周繚垣

通城縣志

卷十八

藝文

十五

牆更橫甃疊岸巋然會計一大觀也每歲秋中親臨倉所限日註收計月米齊隨卽分運轉解南運漕兌之務取次可完向所苦倉屯船運派四倍十之費一概可省爲通破除積蠹興建永利眞億萬年不朽功德也且民便於轉運而蒞茲土者免拙催科民樂於奉公而操國計者無憂困乏足裕之謀兩得光輯之效可臻孰非侯實心遠慮愛民如子治邑如家而不憚勤勞之貽賚哉第非常之舉侯創其始更藉後來者以續芳猷推廣德意補其所未備維持於有終其

爲通民利賴甯有紀耶是役也工始於初夏事終於仲秋通民覩其成樂其便也則有歌而載道者曰孰釋我勞孰與我逸乃建斯倉維侯之績孰任其勞孰享其逸樂只君子永世無斃乃二三耆老以爲此碑於口者也不藉一言無以徵永久就而問記於予予爲撫其大概若此侯諱浩號西濂選貢蜀之內江人董其事者楊幕君諱九成號小橋直隸大興人例得附書遂書之乞言者俾勒石識永焉

通城縣志

卷十八

藝文

十六

學田跋

訓導 郭繼先

典有昔無而今有者名之曰創通之學田固昔無而今有者也創之實自楊侯同寅徐君業已敘其嘉惠盛心勒註成冊垂不朽矣予復何言第典出初有而通之諸士得於創承不可虛糜也貧者當益勵其志而有志者當益底於成但飽仁義無願膏粱由是培穀種於心田去稂莠於嘉禾好學深思以期遠到斯無負楊侯之盛心耳若徒藉此以爲朶頤之供則盛典爲濫觴將毋饜於腹而愧於心乎敢以是爲多士

通城縣志

卷十八 藝文 十七

勗

條陳惠政記

浙江布政使舒大猷邑人

通城爲武昌下邑去郡五百里而遙介岳陽分甯之間盤亘崇山俗樸而民愚垂白之老不覩憲使威儀以故奸宄罔詰誘上行私恣肆而無忌邑務如糧稅里甲徭差之類蚩蚩聽命罔敢逆余昔宦遊時乘公歸省日擊政令耳聞田野愁嘆之聲頻顛無能爲每長歎息萬歷乙酉丁艱家食凡輸賦往役習見而身親之則喟然歎曰何政與法戾哉夫上司奉聖朝德意惓惓以休息斯民爲念行四差行條鞭不啻三令

# 通城縣志

卷十八

藝文

十八

五申無非作法以惠民奈何四差徵銀而里甲答應如故條鞭總科而各則復分追之一役兼數人而爲黨一馬報四家而後定夫無定制饑罔賑恤狐鼠蠶食我民隱忍不敢控此豈與民休息初意耶越三年戊子邑饑且缺令當路定署職以請撫臺梅敦邵公曰通鄰西江饑則可虞署事者非府倅張某不可遂易原擬徑檄義庵公來先是公令鍾祥守興國署崇陽所至輒有惠政無論久暫士民咸戴之通民甚手額公而他署者且至父老相謂曰奚爲後我哉忽報

特與署閭邑欣欣如再造益德梅敦公知人且愛人  
四月公下車首釐夙蠹次覈冗役次賑饑荒次省公  
費撫恤里甲調停夫馬威愛交濟馳行而露湛父老  
彈冠相慶曰公何來之暮耶越三月巡臺又以艱大  
相委督入會省公猶強駐數日定其規制如輸納則  
易知有單兼里併收里甲則裁額外之辦送解戶則  
革三總之科斂皂壯則人充一役屏其白丁救荒則  
計口給粟勸借有差輿夫用禁役胥吏去久戀凡奸  
宄爲民蠹者蕩滌如洗規制大定然後束裝遄發父

## 通城縣志

卷十八

藝文

十九

老攀車相泣曰公何去之速耶公謂法貴永賴無徵  
則不信倘惡害己者去其籍法奚以久又次第釐革  
諸條請爲久遠計當道嘉其請咸謂良法善政惠民  
者當恒守也行邑鑄諸石今讀經畫數事上體皇上  
休息至意下察閭閻疾苦一剔沿習之垢與民相安  
於無事條鞭四差較若畫一昔之誘上行私倚法爲  
奸者自屏跡無所容蓋條分縷析家喻戶曉雖有黠  
者莫之或欺守此五者銀山雋水之民豈復有愁苦  
怨歎聲乎父老又喜色相告曰公何來之暮耶何去

之速耶何惠之久遠如是耶猷夙太息於枌榆之政  
每喟然於林棲之時茲焉邑事更新民若更生樂張  
君之政曷維其忘乃諗諸父老曰惠政其不朽哉將  
來其不愆不忘哉父老唯唯相與磨貞砥勒所陳五  
事暨之邑門大猷不佞特紀始末以弁碑石愛吾邑  
者其尙有考焉公名仕可別號義庵蜀之涪州人由  
鄉進士任本府同知時署縣興國州同知何君惟愈  
本府教授劉君九淵本縣典史馬彬咸慶惠政之可  
久而樂觀其成云

通城縣志

卷十八

藝文

二十

重修拱北礮記

明失名

通城縣治北有古礮九竅石墩上架木板取向君之義而名以拱北乃宋狀元楊公起莘所創也我朝正統丁巳邑宰楊慶覆以重屋正德初板朽石頽而病涉者數載十二年丁丑巡按御史毛公伯溫布政司周公季鳳檄縣修葺維時武昌府知府沈公陳同知唐翊通判馮魴尹覺知縣李蘭典史余正教諭劉啟訓導楊一貞馮介上下集議咸謂工鉅費大非廣募不可乃命僧真誠偕其徒如臨如滿各賚簿勸而邑

## 通城縣志

卷十八

藝文

二一

之好事者壽官杜萬鳳洪彥銀醫官胡鳳耆民吳伯彰陳允鼎仗義倡率鄉縉紳知縣徐守誠訓導何信大使彭伯萬皆願易木以石一勞永逸樂助爲鄉人先以故士農商賈及遠近山谷之民罔不聞風捐貲共成厥美崇陽知縣程賢蒲圻知縣張佩嘉惠鄰疆割俸玉成於是力迺大展因舊貫而改作橋高三十三尺其廣如之長四百二十尺兩傍翼以石欄集工二十餘萬食倍之積石數萬有奇總用銀穀五千兩經始於正德丁丑之七月越六載未就嘉靖癸未楊

君衡準宰是邑興廢舉墜助所不足典史林蕃亦爲  
贊理甲申十月四日工始告竣適郡倅鄒君鐵君張  
君衛君尹君先後以公務至皆樂觀其成而慶楊公  
之偉績賴有續焉由是東通洪都南達閩粵西至蜀  
陝北抵幽冀昔有洪濤巨浪之阻今則如履周行昔  
有淪胥及溺之虞今則易危爲安昔見其咨嗟駭愕  
今則歡聲載道車馬擔負樵採攜挈若騰驤乎天衢  
之上超越乎蛟龍之脊一邑之奇觀也臺垣利濟之  
心郡邑牧愛之政縉紳耆宿倡先之義咸於是乎慰  
且孚矣余敦教於庠覩王政之有成知氣數之當亨  
將必有瑰瑜之士乘時奮發於其間續楊公之文章  
華國以柱石廊廟雲龍風虎駟馬津要與是橋同悠  
久豈獨一邑一時利賴已哉敬紀修橋巔末以告後  
之君子

通城縣志

卷十八

藝文

二二

國朝

創修縣堂記

順治八年

副總戎  
大學士

劉肇國

方今所賴以安天下者藩垣而外厥惟守令然守令之難非循吏不可非才吏不能兼以兵烽殘瘁民嗷然喪其樂生之心而邑倏行更創宰此者不愈難乎盛侯以南充僊品騰茂金馬度冲恬而心淵亮學識才名尤優過之其受令通邑殆出牛鼎以烹雞耳且通邑之俗大有眉州風易服而難治又屢年警戎告歉餉漕不濟國需致讓其官罪其民者有由然矣語

## 通城縣志

卷十八

藝文

二三

曰損政不修不可以救優益政不修不可以救損侯視邑之所急而圖之視邑之所壞而葺之故矢心立政以愛民爲主其平衡均糧卽照糧派丁而十五里之編氓里甲無偏枯矣革除甲總祇用戶長一月一比政簡而刑清則昔之飛詭隱弔者今不啻披雲覩日焉自是一年而修城設險二年而修堂出政非廉如侯疇克捐創非慈如侯疇肯恤募非敏如侯疇樂觀成哉不特此也三冬苦寒釋罪而囹圄空初夏告饑捐俸而餓夫哺民之呼天呼父母不如呼侯也且

聖宮傾圮侯以愛士漣心敦本崇隆務煥整而後卽安通  
文人奮翮拭目騰驤歸侯賜矣侯循與才兼盡之矣  
猥云難哉予兄定國夙任通庠弟廣國附列年譜兄  
關國近署通令嘗語予曰通才鬱勃惜無造士者通  
俗淳厚惜無撫民者侯也如是是大有造於通也轉  
盼內召侯將造八字如一邑通民其有挽之不來者  
宜縉紳士民乞余文以誌不忘云

通城縣志

卷十八

藝文

二四

勸捐建祠引

邑侯 辛禹昆

宋忠臣方公諱瓊竭忠盡節廟祀鷄鳴嶺下志載昭然可考也奈滄桑疊變片瓦無存其裔孫輩奉像輪祀於家久矣今奉督撫二憲欽奉

聖諭加意古忠孝節烈檄修廟宇無祠者或入主於他祠而生員方國翰暨族長方純夏等籲請建祠其報本追遠之誠洵屬可嘉本縣秉彝好德之心何能忍置然鳩工庀材非旦夕可就遂諭附主於鄉賢祠蓋暫也而非常也茲捐微俸外命國翰等傳與通族同心

通城縣志

卷十八

藝文

二五

踴躍廟貌聿新方公在天之靈必怡然而饗其祀祖靈歡悅後嗣必昌從此林林總總衣冠科第自有興者皆方族孝思之所致也若借公營私或爲之不力而不成不特死無以見祖宗生無以對鄉黨本縣以爾等不孝論斷不爾寬國翰純夏等其勉乎哉

祭狀元楊起莘墓文

雍正十年

邑侯

孫斯璩

銀山嵒嵒雋水灑灑秀氣鬱叢鍾靈於公才學蓋乎  
一世宸翰灑自理宗御筆親點一甲二名恩波寵錫  
鼇頭並擎金殿傳雄楚之大儒臚唱揚通邑之蜚聲  
余蒞茲土景仰鄉賢奉清名塚敬掃墓前四圍城郭  
公攸眠密邇乎顯佑隆平之際幸與邑治近焉生芻  
兮一束其人兮如玉勒片石兮酒奠綠默起斯文我  
更祝鼎甲蟬聯步芳躅

通城縣志

卷十八

藝文

二六

傳

皮貞女傳

邑侯

丁克揚

貞女皮氏鳳貞楚之下雋人也父文楚母盧氏胞弟大鵬大受胞姪必元俱爲邑諸生其先爲襄陽皮日休後詩禮名家卓然可紀女生而貞靜姆教夙嫻年十三許配邑之周姓名文彬者彬祖修吉固宦裔也許甫四年寇氛適熾彬爲賊兵所掠莫知其終然爲之翁若姑者前此猶望其歸守貞數年未足奇也逮後十年不歸此子不復望矣鳳釵終斷鸞鏡長辭貞

通城縣志

卷十八

藝文

二七

女將安歸哉爰是父母舅姑勸令再適女則自甘寂處矢志靡他有婉言道之者女輒涕泗橫集不欲作人世想蓋古之截耳者流也父母舅姑亦遂徇其志而不爲之強迄今計其守貞之年三十有一載矣孤燈夜雨冰蘖自恬其殆霜雪不改其操者乎然而親沒之後足跡不出戶庭東城外橋梁三朽爲三易焉更足多也至躬親織紵分內事耳不足爲之子奇所足奇者以處子而終身不字也余官通城繕輯通志聞女之貞而竒之爰爲之歌以紀其事歌曰雋溪有

貞女十三許字人干戈適搶攘遍地皆黃巾寇燄肆  
焚灼楚地無完民藁砧被生擄軍馬如雲屯爾時未  
婚配鳳實處子身公姑夙夜望兒歸偕晉秦去去弗  
復返哀哉陷賊塵承平日且久音書絕魚鱗流光轉  
迅速倏忽年經旬芳華恐終萎命之別選姻之子霜  
雪姿清標軼羣倫掩袂輒涕泣願得全其真椿萱既  
已逝依弟三十春終始志弗渝節操凌松筠內外甚  
肅穆幽貞泣鬼神我蒞銀山土采風及溫純眾口咸  
嘖嘖爲道閨中辛世裔日休後擇壻名文彬亂亡失  
所事空憶延平津毅然誓截耳共姜堪比鄰彤管嗣  
音徽洵屬世所珍聞言意淒惻將以勒碑珉詠歌媿  
不雅藉茲達

楓宸

通城縣志

卷十八

藝文

二八

建修萬壽宮記

貢士 黎正輝  
邑秀倫人

乾隆二十六年辛巳迺

崇慶慈宣康惠皇太后萬壽之年也是歲公事旁午通邑文人輩羣議於銀山之右建修文峯石塔質之七公公曰可甫行舉修復於夷則既拙揀擇柬傳紳士集於明倫堂肆筵設席欲舉行慶賀之儀斯亦率土皆臣普天同慶之至意也夫在國在野自束髮授經時已知

天顏不違咫尺第通屬僻壤向每以邑之隆平作朝賀之

通城縣志

卷十八

藝文

二九

所然非禮矣七公親製捐貲簿給之司事編之首領相其陰陽觀其流泉於

大成殿左經營其地以襄美舉不逾月而宮殿魏闕朝房戲臺繪綵鏤金卓然可觀而

萬壽宮成矣嘻文峯砌塔其費數百計又際以萬壽宮闕則千計之而有餘矣苟非

皇恩薰蒸遍於山陬有以爲肌之淪髓之浹釀而爲年之豐歲之稔則彈丸之邑何以趨事赴功若此哉迨至十一月二十五日值

千秋聖壽之期七公偕諸紳士鄉賢僚屬舉行慶賀是日  
也燈花燦爛綵色繽紛雋城十五里羣頌天保九如  
銀城百萬家共進華封三祝黎園聯吳楚之樂笙簧  
盡閭閻之歡輝固在司事之列者也因并誌之以瞻  
聖澤之洋溢云

通城縣志

卷十八

藝文

三十



重修明倫堂記

教諭 張士樞

乾隆甲戌春余與司訓繆君莪亭先後選授通城學博仲秋入境見山川之綢繆風土之質樸縉紳學士之循謹雅飭心竊儀之乙亥春爰額署壁以山輝川媚四字美之誌景仰也邑學宮居縣治之東規模宏敞巋然若魯靈光學宮之左卽明倫堂周迴三間傍無翼室建於乾隆甲子歲規制雖崇而甄單椽廓日光露射坐間至風晨雨夕則壁土索索有聲屋瓦片片飛墜余與繆君隨時修葺缺者補之漏者彌之雖

通城縣志

卷十八

藝文

三一

暫安無事而心每鹿鹿蓋堂後卽兩官住宅出入必由此堂時懷壓覆之慮也壬午春奉溫學臺歲試檄赴會城初夏接家書知堂爲霖雨侵剝傾圯無遺矣心甚盡焉仲秋旋署與邑紳士謀僉曰此急務也重修惡可緩哉夫明倫堂之設與黌宮并重黌宮嚴密之地瑣事不得擅入懼褻也惟明倫堂則宣諭絃誦恒於斯講習會課恒於斯一切綜理公事恒於斯堂其不可一日缺者於是質之邑令七公公曰諾惜予公務倥偬無能獨任爰捐白金三十金餘出勸捐簿

十本告紳士曰澤宮建立明倫堂以宣

聖諭課多士典甚鉅也通邑茲堂建於乾隆甲子年舊制稍隘庀材亦薄不能歷久無壞今春夏之交風雨殘剝棟折榱頽劃然瓦解事勢然也明倫重地倏爾缺如通邑驚心駭目余與兩學師籌所以新之特約諸紳士會議同心結構各給勸捐簿一本每簿勸輸十兩爲度登明姓氏銀數交付總理諏日興工諸生躬際

聖明沐浴雅化又值年登大有眾擎易舉自當踴躍勸成

## 通城縣志

卷十八

藝文

三二

從此振衰式靡占星聚於一堂秀拔挺生聽絃誦於四國通邑之光亦守土司鐸之願也嗣是邑庠徐家珪等身任勸捐惟孝廉吳峩峙貢生吳瞻衛兩君各慨捐拾金爲之倡餘則多寡任意謹諏吉日破土興工購買一切庀林鳩工以肇其基然費出於公不能齊集幸任事諸君不辭勞瘁陸續佈置得寸則寸得尺則尺於甲戌春始成正堂三間於舊制稍易之籌其盡善合於形家之言又翼以左右陪房高下與堂相稱宏整明潔窗櫺戶扇俱極周堅而堂之規模大

備其丹雘梁柱粉堊全牆裝修  聖經屏門重飾匾額者則邑庠廩膳生員吳芳綬獨力承修功貲尤懋惟門樓甬壁圍垣尙未就緒時孝廉吳公暨邑庠章南士國學葛行琥等以修撰縣志在城又樂以修志之餘貲爲攸繕斯堂未給之計行見奎壁增輝山川叶應足爲一邑之光而守土司鐸之願遂矣謹將經始落城巔末詳記以附邑志俾後之覽者知重修爲何年月而邑紳士之知急所先務於不朽云至捐貲紳士姓名銀數則另勒貞珉不譌不漏其寒暑鳩工

## 通城縣志

卷十八

藝文

三三

勤密者則余長男廷照莪亭長孫承潔例得併書焉

周母聶氏節孝誌

教諭 楊 仁

國家久道化成

特恩採訪

旌表忠孝節義復令本家自陳儒學通詳一時深山窮谷  
聶屬轟起彩徹雲衢所以發洩幽光典至渥也節母  
聶氏邑庠生周之瀾之繼配也元配劉氏亡長男文  
琅頭角纔見氏于歸年甫十六越十一年而之瀾不  
祿時白髮祖姑在堂黃口孤兒繞膝傷矣天道叵測  
教文琅已食餼而又中折兼苦乏嗣抑又傷矣氏命

通城縣志

卷十八

藝文

三四

己生文珪之子德銑繼嗣與其媳華氏咀冰嚼雪共  
勵熊丸邇來二十一年

旌表再懸拭目待焉竊念從古道德功名多出於節孝之  
門斷機截髮歷有明徵今其子文珪蜚聲藝死文璋  
文瑗馳譽成均其孫德銑亦列庠序卽環階童稚炳  
炳麟麟具虎氣龍光之概知爲善無不報天將大有  
啟於周氏之門乎則夫祇承志意積厚流光所爲上  
報母德與

朝廷闡揚之至意者尙其勉旃毋怠

重修大堂記

恩副榜 葛忠郭 邑人

邑侯張公既召胡生世賢諭以捐新

大成殿及兩廡戟門櫺星壁池等處告成遂以語余曰  
聖廟鼎新甚快事矣顧公署星羅縣治尤重憶吾通自順  
治八年盛公允康開創一新今則瓦敗垣頽棟撓榱  
折堂廳之間日處之皆危境又如科舍倉廩幾至簿  
書錢穀風雨不蔽膺民社者安忍聽其至此吾計非  
大爲更創不可顧需費動數千金竭吾廉俸不當數  
之一計惟是因仍舊規量吾力以補葺之期於堅可

通城縣志

卷十八

藝文

三五

久也樸陋不嫌矣余謂如公言誠難大舉顧通邑縣  
治幸而遇公而適會公留意整理而又不能滿公意  
恐公之後終歉懷也余觀公之來通也甫數月通邑  
人卽比之廉公來暮至以德公之甚而慮公之陞遷  
速也且曰願借寇君一年公之入人心也深矣盍召  
而俾之襄助焉侯曰君之爲我謀也固當但今歲歉  
而又重病之毋乃不可乎抑斯事也宰斯土者責也  
毋甯稱吾廉計若需以毋滋民擾余以是知侯意決  
出而以侯之言告知邑紳士越數日邑紳士聚而造

余謂賢者樂附仁人君子後侯捐廉以成吾邑美而  
吾輩不能相助爲理竊自羞咸願以共襄厥事請余  
達其意於侯更創議遂定乃諭諏吉召工程規度費  
不逾月林木山積工役子來丙午秋之季大堂成再  
越月傍之倉貯及各書吏等科與夫後堂書齋賓館  
俱竣焉余顧之洞開重門光明俊偉計自今登堂布  
政尊嚴其有體也吏胥執役奉公心安形適也案牘  
無憂毀壞而儲蓄不虞朽蠹也侯其可快然無憾矣  
乎余以是嘆侯之感人深且速而邑紳士之勇於行

## 通城縣志

卷十八

藝文

三六

義而樂善急公之誠可風也烏可以無傳而侯且曰  
仗諸君子相與以有成耳若余者相邑之急而圖之  
長吏職事也曷足傳余曰嘻縣治之待急圖也已數  
十餘年矣

陳江氏節孝傳贊

舉人 吳開澄 峽人

母江姓本邑人誕明太祖洪武二十年丁卯歲予大  
太外祖陳公子達伉儷也明太祖徵賦制州縣分都  
里都里分甲遴糧多才通幹一人充里長里十甲甲  
里長一官徵賦竣事京編南糧輪運里長依限司解  
納甲年一甲領通里糧解則解通京編六甲乙年糧  
解二甲則七甲敍京編領解輪至己年則領解者一  
甲京編而六甲南糧也輪次旋復毋敢紊十年十甲  
編糧分解一週故又曰排年京編交部無虧損戶部

## 通城縣志

卷十八

藝文

三七

彙名帶陞見帝面詢民利病幽隱奏對稱旨者視精  
畧敏鈍等授給職官冠帶時里長任稱榮重子達公  
饒阡陌糧夥佃儻善幹局遂選充上黃里三甲里長  
甲午歲永樂帝之十二年簽公領解通里京編殞京  
師邸時母年二十八歲子伯英公余族外太祖也甫  
襁褓耳母聞訃號慟垂絕者再牢志擬身殉諸姑姊  
姒娣周防曲勸曰古類以撫孤蕃祀孝以玉節而子  
呱呱藐諸孤而夫血祀一綫也而殉而志孤將誰鞠  
如是諄復者久之母志始漸回強粥殮掩淚浼族達

迎神主盡禮訓子伯英公慈濟以嚴固性牖敏學富  
詞章恢蕙楹廓田疇通崇臨巴諸邑代以稱貸舉火  
者無慮萬千家巋然展一大廬牟也母勤勞性秉暮  
齒猶繅績紉紉不寒暑輟嚴督子孫婦執女紅勞無  
違言肅肅雍雍敦睦樂施與溢族鄰間爲後世閨壺  
型而追悼所天肫惻至耄猶未少衰境有寶勝寺者  
闢宋理宗咸淳間元季紅巾之亂燹於寇母命子伯  
英公從山業主百姓購受披荆淨礫重新梵宇延僧  
伽焚修翻唄爲子達公資冥福母貞壽八十齡至明

## 通城縣志

卷十八

藝文

三八

成化丁亥歲捐幃幙子伯英公就寺右隙址增構觀  
音堂置香火田塘三石六斗週圍山場一所附祀母  
主迄今每歲元旦子孫聚族展謁拜奠母存時邑紳  
士公闡母節孝請上題旌表建坊母沒勅建節孝祠  
縣治學宮左官製母神主位中座春秋仲上丁邑大  
夫命師儒分裸獻逮今裔嗣椒衍衣冠詩禮累□勿  
替余九世祖妣孺人爲余太祖諱瑞公右室則母之  
女孫也余族亦藉母溢澤波及今茲者則母啟後以  
代夫蕃祀以成孝孝以玉節也贊曰天柱地紐繫誰

拄撐臣忠婦節媿力扶傾浩然正氣巾幗崢嶸青鬢  
筠翠鮮筍松青凌霜凜雪坤代乾成經緯勅置楹陌  
增營乳穀義課暉賸華亨祥發椒衍食報堅貞春秋  
俎豆邑里祠榮世光青史媿彼降纓

通城縣志

卷十八

藝文

三九

泮池古井記

教諭

張起唐

黃安

道光八年戊子歲季春月庚子朔爲戟門暨儒學頭  
門上梁之吉辰時則新鑿泮池已深二尺許矣原上  
年初三乙亥日相度學署隙基建

文廟此處屬舊明倫堂之右偏行道坦坦無異也忽於  
內掘出方整舊石百餘塊斯亦奇矣越翼日辛丑日  
未刻首事趨而告曰池中又得古井一口請往覘之  
至則聚觀如堵欣笑喧闐掇去幕口覆石碧水一泓  
壘圓澄湛探以竹竿約深數丈有汲而烹之者曰清

曰甘有緹而浚之者曰深曰廣沙礫則汰之缺甃則補之載醜載滌飛泉四出僉曰竒哉此建縣時古井或云此老泮池也胡湮閉至今乃見也予曰庸詎知非數千載以上之蹟耶所異鑿池者胡不謀而合也使稍違數武則不能得矣縱得之於彼而非池中亦不足述矣夫趵突虎跑蹟之靈刺山卓錫蹟之幻今茲池中之井更有神助焉若曰此真天造地設確不可移者不然泮同也曷以得井井同也曷以在泮井有清濤池與共之池有芹藻井與養之殆所謂相得

## 通城縣志

卷十八

藝文

四十

益彰者歟爲斯井賀爲斯泮賀更爲新創

夫子廟堂賀爰敬誌之與同學諸生共勗焉贊曰井有德泮水爲鄰井有位芹藻之馨閔塞復明井之遇炊爨勿褻井之數有名士風抱道自重有隱者志待時而動如神龍升如威鳳起是洙泗源非汙潢水昔養晦兮懷清蘊潔今得志兮沐日浴月無俟照星盆不躍蕤賓鐵泮也井也兩美同兩美必合均天功天合自然應人合圓靈一鑑開清空此時筮得井之五中正寒泉唯德輔三爻受福上大成涵泳優游霑化雨

重修青陽書院記

邑侯 饒拱辰 江西

國家既立學校以教天下之士而又俾省府州縣各立書院以聚學者蓋廣其教之路多其教之之人使成材者眾足以備斯世之用德至隆也意至深也通邑向有青陽書院乾隆時重建距今五十年矣予權篆茲邑視其垣牆傾圯門廡頽敗居民雜處豕口鷄埒滿室既下令驅逐掃除且急謀所以新之者捐廉俸與邑中人士輸資得錢若干命工房吏經其事壞者更之剝者葺之輔翼觀瞻之具前未有而今不

通城縣志

卷十八

藝文

四一

能無者舉之木材之費瓦石之費工匠之費爲錢百七十串有奇先後兩閱月而工成祀宋五先生於講堂爲學者端趨嚮集博士弟子與應童子試者課業其中諸生皆訢訢如也乃進而告之曰凡肄業於是者其惟是專心舉業博取科第爲富貴資耶抑將講明義理修身慎行循循然莫不有規矩使無爲君子之棄而小人之歸也夫習舉業以博取科第固今之學者所不廢然使無講明義理修身慎行之素即使舉業工而科第得其不爲士林詬病生民患苦者幾

希國家所爲教育之使成材而備用者將何賴焉且夫士者民之望也民風之淳漓端繫乎士習之臧否諸生能孝友而家睦而宗族和而鄉里重義而輕利崇讓而息爭吾知必有聞陳仲弓王彥芳之行而奮然起翻然變者反是則蚩蚩者將曰彼讀書者如是稱薦紳者如是吾儕何知焉又何責焉嗚呼此則吾黨自貴重而有志行者之大慚且懼也此予亟新此書院與諸生孜孜講習之意也諸生勉乎哉既邑人士請爲記遂并以此語勒諸石

通城縣志

卷十八

藝文

四二

重建考棚書院記

邑侯 袁秉亮

士爲四民之首士習所尙則民風因之爲轉移故善爲治者思欲一道德而同風俗末有不以端士習爲亟務也

國家取士之法先試於郡縣然後上之督學簡其秀者送隸學官使之肄業凡以誘掖而造就之者意至美也顧限於定額其未列學校者既不獲執業門牆而已列學校者每視月課爲虛設甚有一衿自足終年不涉文藝者如是而求士習之振興烏可得哉書院

## 通城縣志

卷十八

藝文

四三

之設實與學校相輔而行者也其名始於唐其教盛於宋我

朝因之徧於州縣蓋於設官課士之外更延德行道藝可名一世者爲之師俾生童咸得鼓舞觀摩不待考試之期而已躍然思奮故其成材者出則爲國華處則爲民表間有仍蹈歧途自甘暴棄者固已寡矣然其興也必有賢司牧倡於上而一二鄉先生和於下故其廢也非徒官府之責凡地方紳士亦與有責焉通邑學宮之旁舊有考棚又其旁則爲書院咸豐四

年悉燬於兵九年傅公蒞任始議興修邑中黎姓素稱巨族願任考棚少樸首捐田若干石又以勸捐團練餘資交邑紳王貽我鄭秀羣方輯五徐思九續自申等經理任修書院未幾傅公解任嗣後屢議興修不果歷年試士課士俱借學宮殊形褻越同治三年余承乏斯邑甫下車循閱遺址慨然者久之司鐸鍾君壽朋盧君殿才夙有同志力贊其成詢之則黎姓捐田半已無存而膏火經費亦入不敷出視前此之籌建有更難者余以考棚書院俱爲課試而設二者

## 通城縣志

卷十八

藝文

四四

旣難兼營宜從合辦諸紳士僉以爲然於是自儀門龍門及東西兩文場則黎姓任之自至公堂及堂後餘屋則合邑任之是年九月興工次年冬月完竣爲儀門若干楹龍門若干楹兩文場若干楹至公堂若干楹堂後餘屋若干楹此外隙地立石表之姑俟後之君子踵事增華以復其舊則是舉也未必非文運漸興之兆也余宰是邦僅九閱月旋解任去方惜覩其經始而未覩其落成也鍾君以書來必欲得余一言爰記其緣起如此

加廣文武學額碑記

同年治

訓導

盧殿才

應城

學額所以覘人文示鼓勵也唐宋以來代有更置我朝雍正二年釐正直省府州縣學定額毋許輕易如增以杜佔冒例載有試卷不敷額數應予裁汰者有考試一週將額多人少學分抽撥示獎者然則加額豈易易哉通城學額前止八名

國朝順治年間邑侯毛君鍾彥見通應試者廣申請督學疏題准改中學十二名咸豐間軍興以來邑侯傅雅三勸捐軍餉銀二萬六千四百餘兩接年團防計

## 通城縣志

卷十八

藝文

四五

捐銀七萬七十餘兩欣逢

朝廷洪恩廣沛奏准各省報部捐款加廣文武學額經邑侯李君毓夫詳明因援奏定章程以六千兩暫廣一次文武各三名以二萬兩加廣永遠各二名又以團練銀七萬兩加廣永遠各七名自乙丑歲試爲始文武取進各二十一名府學照常撥入不獨小試免憾遺珠卽大比觀光者多士氣益奮由是歌鹿鳴題雁塔聯步螭坳而文風之鼎盛縣運之轉移指顧間事耳諸生其知勉哉

推廣保甲議

舉人

吳開澄

峽人  
邑人

朝廷以害民莫酷於匪窩而匪窩詭祕或入匪三五載甚或十餘載始一敗露確賊又祇以初犯枷責輕結則從前良民之受害已無算矣所以楊督憲題准部覆通行直省設立保甲責成稽察舉首先事而防之弭之也顧立法必須洞徹人情周通物偽詳密罔漏法始可遵可久卽印官明知莠民未經獲有真賊確據遽拏擬詳及至上審匪徒頑脛熬刑狡供不承上憲形隔聽遙印官尙難免故勘平民縱役誣拿分別

## 通城縣志

卷十八

藝文

四六

之吏議保正甲長何權何藉率將未犯賊據之匪窩舉首請法詎能免惡徒捏誣由賴之禍乎此保正甲長雖察知真匪真窩不能不畏禍容隱也此各憲亦體量保甲無可奈何之情審擬歷案賊犯不忍概加以從前狗隱之法也此保甲設經四十載卒無稽察弭盜實效也蓋緣立法之初未加之銜勒未予以依據羽翼斯難責以實力察舉耳茲再四圖維惟有族鄰房主保任甘結之一策尤恐以匪保匪債戶則責之房主保任牌鄰保甲之協結已業繁族則公報戶

首保任零戶公報鄰民保任此予保甲以依據也甲長保正仍一體加具總結又另造正副二冊副冊存執正冊呈官自十六成丁上至七十逐戶逐名分註某某戶鄰保任結實字樣某某戶鄰不結察實字樣此加保甲以銜勒也則保甲得以有所藉詞破面不得不實力稽察矣地方官憲查冊內無結保任者則莠民自分矣債戶則押回原籍移取原籍戶保管束毋許再來甘結備案己業繁族則另遴戶首零戶另遴戚鄰具結管束仍勒本匪自新甘結然無人保任

## 通城縣志

卷十八

藝文

四七

之戶自知己爲莠民證據必百計捏誣反噬甚或輕生由賴加之莠民之親故及與戶鄰保甲等宿嫌者藉命居竒者從中慫恿誣告自俗情所間有者官憲須通集本圖鄰圖煙民百戶以上逐戶偏問勒結證莠者十之八九證良者祇十之一二則莠民已確卽勒證良者保任甘結嗣後一經犯案加倍連坐賠贓此予保甲以羽翼也斯有以壯膽實力舉首矣至於仇扳由賴輕生州縣審驗詳到 上憲親卽判行轉申銷釋毫毋假手經胥任其苛駁留難擇肥巧索則

保甲戶鄰毫無絀累自不視爲畏途前鼓後效矣否  
則人心各有衡權謂狗隱之連坐賠贓後累猶輕且  
緩萬一匪邀改行匪幸漏網尤未可知何如避此密  
舉釀命者禍速且大乎爰是累一驚萬良法仍弛矣  
此尤藉上憲實心實政大爲體恤保護也如此則保  
甲旣有所御勒又有所依據倚仗則匪窩無處著腳  
矣保甲良法自非同於具文徒爲州縣紙筆硃墨耗  
矣芻蕘末議用備採擇焉

根緝賊賊議

舉人 吳開澄 莪峙  
邑人

## 通城縣志

卷十八 藝文 四八

通邑僅東一面界本郡崇陽一邑西南北三面俱聯  
湖南之巴陵臨湘平江江西之甯州互相勾線捫銷  
賊據所以通邑之竊匪較他邑爲多從前緝盜之法  
保甲雖屬具文猶藉有一經報竊立差捕快拘拏案  
匪根鞫新匪新賊縱此一案匪或已改行或頑脛熬  
刑護黨未有諸案匪盡改行熬護者爰再拿二三案  
匪隔別嚴訊鈎距術給鮮不互相攻擊舉發卽賊散  
數百里外多憑供招而獲也所以報竊破案者十常  
五六自乾隆初因捕役私拷案匪勒索釀命之案各

省時有而未經外任之科道部院因噎廢食奏議覆准定例盜竊案件必先緝獲現贓方許根拏匪賊等文積匪見有此例無不鼓掌稱慶遂比夜分贓挑赴數百里外府縣繁鎮銷賣滅跡捕役之家私幾何安能繁僱偵探宰牧之養廉幾何安能繁捐賞給四遠家緝戶調乎所以役畏罪空罹提比官畏議瞪視案賊束手無策而報竊破案者百無一二也猶幸前任梁憲洞悉賊僞就新例中通變調停潛飭捕役仍拘案匪戒勿私拷勒索一惟送官嚴監隔別刑鉤故梁

## 通城縣志

卷十八

藝文

四九

憲中任報竊破案者十之四五迨乾隆二十年梁憲以卓薦赴京引見適捕役樊二搜沒崇邑積匪孫世華無主竊贓孫匪赴通控告誣良拷洗署事楊丞不移訊崇案崇民役匪並罪失出孫匪爲良獨入樊役棄市由是梁憲歸署亦不敢飭役拿訊案匪矣馴致竊案頻仍報案纍纍百無破一第思未獲贓據例禁捕役妄拏案匪者爲其私拏私拷詐勒威索或致釀命也嚴禁私拷詐索一惟送官根訊而物以類知匪黨窟線潛通未有不十案破七者倘不就新案例中

如梁憲中任調劑變通將見竊匪日肆滋蔓難圖民  
害莫可勝言矣此愚等生長草野真知實驗千慮一  
得之見備爲當事者採鑒云爾

弭訟安民議

舉人 吳開澄 峽  
邑人

皇上御極之初卽詔曰訟師倡妓賭博打降謂之四惡周  
公所謂亂民孟子所謂賊民也等諭直省省地方官  
嚴拏法究縱失分別處分而四惡之中訟師爲害尤  
加慘烈如通城山僻愚民力作敷口惜鈔如金誰肯  
好訟傾家祇爲訟師居竒激愆刁唆代爲造契約造

## 通城縣志

卷十八

藝文

五十

印券甚或遠造明朝約印若輩代詞橫言巧筆又賄  
串一班利口刁棍扛幫硬證及至庭審詞供一氣問  
官被朦枉斷弱者吞聲莫愬力者激忿上伸上司形  
隔聽遙提閱縣案條條是理不得不層層被欺矣數  
百金貲產之家不三四年蕩覆罄空矣則訟師較之  
上盜祇劫人財者尤爲慘毒爲民父母之謂何竟忍  
瞪視若輩吞噬赤子負

君委任哉則杜之之法惟有示諭兩造互告彼此訟師告  
訴之初未必卽知彼詞誰作也俟訪實訟師指告之

日卽爲拘訊令兩造訟師旁立看審情無增減理直者卽將代詞釋歸理由增減者民則當堂枷責衿監則發學注劣戒飭甚或爲之描筆造約造契則非受重贓必無肯自絕子孫爲人作惡者民則刑訊贓銀衿監則詳褫拷贓按律科罪更甚爲人箝蓋假印依律造斬用遣萬毋執大事化小謬說留遺民禍也然若輩訟師必狡辯被誣殊不思兩造敵訟之時則彼此代詞訟師正彼此血仇也斷無有釋害已訟師反枉拉他人者至於硬證定例與誣告者同罪一一依

## 通城縣志

卷十八

藝文

五一

律嚴處無貸而謂民間猶有曲筆曲舌扛聳居竒破人身家者愚不信矣但今州縣官寬縱干譽畏蘖自便者多不肯報上法究耳是在上憲力爲體訪處分牧令法始可行害始可除耳

究鬪搶奪議

舉人

吳開澄

峨嵋人

通邑有數處敝俗輒云官法遠蠻法近強徒多令子弟延請教師習學拳棍武藝強凌弱眾暴寡動相究鬪羸者見彼重傷難經官驗隨賄請件作近城者至家遠城者奔至城中會件作做成致命重傷抵賴從

前如周陸梁三公情殷民瘼報到立親細驗嚴懲假傷根鞫傷是誰造枷責無貸由是件作人等不敢受賄造傷此風遂戢餘俱玩視民傷怠緩臨驗亦粗率遂致真僞混淆平時又怠於法審遂致真傷受屈飲泣草和由是兇鬪愈熾甚至釀成人命伯仁由我爲民父母者獨不爲子孫消孽乎弭之之法惟有親卽細驗嚴懲假傷究是誰造嚴法枷責一循周陸梁三憲故步則奸徒不敢造抵件作不敢狗隱兇鬪自戢矣至於輒因小忿或爭田產動輒牽牛錮牢饑渴

## 通城縣志

卷十八

藝文

五一

疲瘦或貧孀圖娶或裕孀圖產輒糾眾械搶逼婚逼嫁通邑間有數族敗俗釀命急宜嚴杜惟有嚴拏主謀刑鞫賄請打手何人依律重杖重枷從黨亦不輕縱慎無襲大事化小謬說翻致小事釀大如此則搶奪弊風永杜矣又獻此愚見爲當事者採焉

辨杜造假議

舉人

吳開澄

峩人

通邑有數處訟師包訟居竒慣聳嚇鄉愚代描筆造契約造假印箝蓋朦混問官占人產業從前被朦者恒十之三陷人累訟不甘破蕩家產深可痛恨然辨

假之法則有至理捷方焉如字有橫豎點鈎挑撇揭拖之八法從未有自不善書而能描人筆跡者善書者筆勢自必熟溜描筆者筆勢自必強澀况字之八法書者各有輕重拘肆之殊其勢描筆者必目視彼筆手揮此紙無論筆之新舊硬軟縱彼字恰肖而此字必仍露本勢縱彼法恰肖此法必仍露本勢者縱法法俱肖必筆勢強澀不似善書人筆勢熟溜且肖者筆必強澀不肖者筆必熟溜用此核對筆跡則契約之真假立辨矣至於遠年字跡墨不透紙背而紙

## 通城縣志

卷十八

藝文

五三

色陳舊略帶淡色字縱濃墨墨色似醜非醜爲其透背之墨蝕淡也然近聞描造奸徒紙不用茶浸塵染調醋磨墨假約書畢寘之飯甑蒸熟令墨透背令紙泐漬印成花黃老痕其摺痕或用藥染半斷半續或用桐葉裹緊安入穀糠慢火灰中俾桐泐漬紙染成老色老痕然諭被告多求彼年內外紙色細加核對則飯桐泐染自判矣至於假印但諭被告搜求彼年內外老約印紋細加核對則真假尤易判矣又有遠年空白印紋噴水摩令墨銷巧飾印上之墨疊紙裱

稽者然印色模糊偽造立明矣辨明之後根究描筆  
何人造色何人造印何人用印何人依律究擬不少  
姑息則人皆懾懼此創一警萬之方造假自永杜矣  
獻此草野愚見用備除弊整俗者採擇焉

杜經胥抽換卷約議

舉人 吳開澄  
峨嵋人

通邑有無良訟師受賂包勝占人產業一味厚結經  
胥或敵詞理訴彼辨窘術窮恐臨審官研閱理信輒  
賄經胥抽匿或將詞契內緊關字樣挖改疑竇字語  
尤或將己詞敵詞仍補原字反誣人補更竒者將敵

## 通城縣志

卷十八

藝文

五四

眞印契約換造鈴蓋假印反誣人假種種鬼蜮伎倆  
巧朦官目枉斷漁利前任宰公被眯誤枉者恒三之  
一激致輸者受屈不甘破產上控及邀准吊卷原問  
雖或事後覺悟不肯認錯損名上憲形隔聽遙直仍  
屈曲激致翻盡衙門產盡家傾忍泣拜詛而後已可  
憐哉可慟哉爲民父母之謂何顧忍瞪視吾赤子  
戕猾胥訟之手毒極慘極至此哉所以古名宦有舞  
文法亡之誅也從前猾胥舞文或臨審閱卷追出或  
審後告發刑訊索出奈前任類多徇縱僅一留役薄

責了事猾胥倖痛輕利重也尋愈膽壯無忌關說棍  
劣訟師倖不根鞫過付代賄也旋彌得志串弊釀致  
眾胥涎豔强半效尤狎法故舞文煽風楚省無如通  
邑之甚者也杜之之法惟有示諭訐訟兩造呈驗契  
約一正一謄正約存署粘連副狀謹貯謄約發房以  
便訟敵查綻指辨則賄串抽挖奸弊永杜矣兩造稟  
狀續詞並鈔粘條辨諸牒概用一正一副正牒發房  
以便訟敵理辨副牒序粘存署倘遇事故封固移交  
接任審結時俱從內署尾粘讞語鈴印面給審直者

## 通城縣志

卷十八

藝文

五五

收掌毫不假手經胥正牒錄讞序粘鈴印存房備案  
磨對其審結後或上控提卷或調改翻訐仍諭審直  
收掌人具詞當堂呈署取對存房正卷無異隨將正  
卷或賚上備查或發房備案副卷仍面給審直者領  
回收掌更杜賄串上胥挖改奸弊如此立法則抽匿  
挖改諸術坐窮矣倘此法外別有舞文一經敗露卽  
行革役輕則重杖重枷重則科贓詳擬尤嚴鞫關說  
訟師科贓同罪蓋鄉僻愚民熟識經胥者恒少全仗  
棍劣訟師引線烹肥也如此立法則猾吏訟師縱有

雷膽神奸亦不敢肆矣至通邑包訟光棍劣衿尤有一種巧術爲歷任官所莫覺者一遇敵人理駁窘辯之詞既經告破不敢抽匿挖改每將緊關不提頻用複語衍文游辨疊稟十餘紙甚至數十紙者名曰混堂經又曰眯眼沙計謂游詞冗疊卷內忖令問官目厭神倦翻致理辨肯綮敵詞莫或遇目細研矣前任被此術朦混誤屈者恒三之一杜之之法惟有將催審催追諸浮詞於存署副牒另置一束祇將兩造理辨緊詞分別粘連臨審研核尤嚴示兩造只須條辨

## 通城縣志

卷十八

藝文

五六

三五紙而止再多當堂擲出如此辦理則眯目沙混堂經狡伎立窮矣古哲云仁者愛人故不欲人害之也秉道執法懲一安萬實仁也陽善也違道干譽縱一害萬假仁也陰惡也則舞文猾吏訟師詎可縱容流毒自取學術不明邀殺子孫陰譴報哉

詩

唐

仙翁石 黃龍山

呂純陽

山高一千八百丈道書二十五洞天落花飛出水衝  
石翠帳撥開風捲煙金鯉一雙遊碧沼石田三畝產  
紅蓮我來絕頂無他事爲訪仙翁葛稚川

宋

劉磐幕 幕阜山

許元信

山懸翠幙幾千丈我疑山頂卽天上捫蘿躡蹻到山

# 通城縣志

卷十八 藝文詩

一

巔猶如平地上青天始知天高應無極幕阜蒼蒼一  
卷石洞庭八古所傳對此遙看一鏡圓當此再上  
三千丈那知天下有山川

又

王炎

昔聞幕阜古洞天偶馳瘦馬行山前諸峯却立一峯  
出蒼然墮地走復旋誰燒石竈汲丹井絕頂萬丈巢  
飛仙捫蘿攀蹬敢憚險欲往未有一日閒仙翁見我  
定拍手笑我何由來此間雨霖日炙行路難何如鸞  
鶴遊雲端人生不比金石堅向來如鷹今蒼顏百年

富貴草頭露何乃自苦麼一官雖無道骨可不死亦  
欲早掛頭上冠南山之南北山北築室翠微高枕眠  
雨行晚晴謁黃龍禪師

黃山谷

山行十日雨露衣幕阜峯前對落暉野水自添田水  
滿晴鳩得喚雨鳩歸靈源大士人天眼雙塔老師諸  
佛機白髮蒼顏重到此問君還是昔人非

金雞石

狀元 楊起莘 邑人

石在銀山之麓上鑄金雞二字

千年古石號金雞化雨霏霏長羽儀不把稻粱爲食

## 通城縣志

卷十八

藝文詩

二

啄且將天地作籠栖祥雲架上非孤立入曉聲中豈  
亂啼過客莫同凡鳥看等閒飛到鳳凰池

明

銀山積翠

邑侯 王 恭

銀山屹立對花封草樹蓬蓬翠色濃政暇幾回翹首  
望不勝仰止企前蹤

秀水廻瀾

邑侯 楊 浩

一脈盈盈帶郭來溶溶錦浪幾滌洄何能一取磯頭  
水散作甘霖遍九垓

雋溪映月

邑人 何 隆

雋溪流水靜涓涓雲散晴空月正圓萬頃寒光澄素練一泓秋影漾嬋娟金波不動汪洋水玉宇無塵上下天此夜廣寒宮不閉清空池上集神仙

又

任浙江布政 舒大猷 邑人

碧波蕩漾影嬋娟水底雲端一樣圓天上化形誰識得仰觀俯察思悠然

石塔穿雲

訓導 劉 宏

玉笋嶙峋插太空光芒直射五雲中登臨四顧渾無

# 通城縣志

卷十八

藝文詩

三

際人在蓬萊第幾宮

遊九峰觀

周 樂 邑人

一入九峰山江山指顧間平生未着足今日始開顏  
柯爛人何在雲舂碓自閒紅塵飛不到別是一仙寰

巡撫通城

都御史 吳 琛

三年兩度至通城山路崎嶇不厭行漫布網羅搜吏弊徐停旌節問民情怪渠旱魃從天降苦我農家不  
歲成自媿一官叨國用撫安切切爲蒼生

通城道中

御史 余 坤

甯親便道過通城咫尺鄉關馬兄輕山埽翠眉迎使  
節柳垂青眼照行旌堂前白髮愁中緒膝下斑衣夢  
裏情指日承顏何以壽願卮北海膾長鯨

過九嶺

叅政 王鼎

滿路春風拂面來肩輿白髮未頽摧山如識我頻回  
首花本無名只亂開人語靜隨空谷應水流還趁小  
橋回欲收形勝歸風雅投筆誰如子美才

自崇抵通

時華林盜警

提學 蔡潮

桃溪邂逅復通城宦轍應慚似水萍更有眞愁難仗

通城縣志

卷十八

藝文詩

四

酒可憐終歲只論兵四郊羽檄勤烽火百里謳歌雜  
鼓聲明發閒關經岳道好將時務策諸生

冬日遊銀山

訓導 劉宏

偶來載酒賞銀山風景悠然興不慳鴉護舊巢盤樹  
上虎留新跡印苔間野梅帶雪參差發澗水連雲一  
樣閒歸到琴牕心似洗薰爐燒盡鷓鴣斑

登團山閣

叅政 汪必東

團山高閣勝蓬萊幾個閒人解此來只爲鶴琴妨舊  
性暫將花鳥豁幽懷兩三童冠偕風浴百轉歌喉繞

露臺漫說家鄉千里外乾坤內面莫相猜

登團山閣

次參政原韻

任浙江布政

舒大猷

邑人

銀山秀水小蓬萊一閣旁招四美來畫棟朝雲迷樹色蟾宮秋月暢吟懷河陽花映黃金闕檣類星高白玉臺不讓滕王江上閣落霞孤鶩豈相猜

宿銀山寺房

舉人 陳曾

雲霄羽翼正橫秋暫借紺園一宿留燕闕幾年經苦戰蓬萊今日得真遊半空石室藏巖谷五夜禪房宿斗牛讀取金綱經卷罷漫將鐘鼓發高樓

# 通城縣志

卷十八

藝文詩

五

春日遊金盆寺

進士 楊

佐興國州判

蟠龍古剝地幽幽今日乘閒始得遊洞裏桃花春不老巖前寒石水頻流穿林好鳥清音巧沿路垂楊綠影稠自是斯文無外事漫將詩句作賡酬

又

都御史 劉景韶

崇陽人

金盆落日拂征衣石磴盤雲上翠微萬壑晴煙含雨意諸天色界淨塵機定中不作浮生夢天外甯知世事非自笑俗緣還未斷漫從花下撫朝暉

石盤灘

縣西南九嶺麓

參政 王鼎

野水縱橫轉百湍水中巨石鏡光寒無窮意趣眞天  
設漫數龍門八節灘

春日遊翔鳳寺

邑侯 趙三台

鳳翔古刹隱巖阿轉旃閒尋鳥道過霧裏幢翻空色  
相風前鐘吼度煙蘿鶯遷陌上辭幽谷雀噪枝頭閒  
釋迦到此渾忘塵世慮癡心還擬寄雲窩

露禱回天

教諭 徐應斗

躡攀靈嶽叩蒼穹露冕披忱感速通轉瞬雲霾驅漢  
外霎時陽德灼寰中曦輪再覩堯天麗軒鏡重開舜

通城縣志

卷十八

藝文詩

六

日同響應眞如桴鼓捷人誰不頌大夫功

太平春耕

教諭 徐友

聞道太平地春耕獨占先綠蓑三月雨紅杏半林煙  
場圃豐多稼罇疊慶有年家家酣白酒擊壤樂堯天

燕臺懷古

舉人 吳應鵬  
圖南  
邑人

崇禎辛未考選推官第一吏部王大堂覆試

以詩

秋螿晴鴈薊門陰慷慨渾疑擊筑音謀國豈緣輕白  
骨招賢未是築黃金從王義重常天地好士名高自

古今指顧河山成往事帝城佳麗正相尋

國朝

赴茶陵任宿河漣橋

教諭 黎正經 邑人

行旌此日駐河婆野豔相參陌上過風鶴疑兵思借  
箸馬牛呼我最高歌忘機水鳥迴翔迅聽瑟江鱗活  
潑多漫說衡陽書斷雁且教餐蔗莫言他

送列七邑侯調任黃陂

邑舉人 吳開澄 峨峙

親民歸牧宰父母望明賢閔鬻勞成愛鋤扶惠罔愆  
仗公抒保抱報國副承宣淹貫儒經史矜廉儉作緣

## 通城縣志

卷十八

藝文詩

七

魚懸東壁空鹿瘞北園煙竿牘無門入苞苴莫竇傳  
蒞官謹礦鐵讞理爍爐鉛對簿恬聲色吐情沐煦憐  
緊關披鏡照肯綮蕪犀然諗爲殘苗蠶幻攢擁足虻  
剛礫苞訟蒂義決賈謀川巽艮懲三蘖東南息百廛  
繁辭刪險坎五鬼讐囂乾學校秋風憩閭閻夜雨眠  
憂勞強半載釐剔甫週年獄減三之二風恬陌與阡  
馴良游綠野羸弱泳青天庶尹徵惟日時霖應大田  
四蟲咸斂隊百穀累豐連公退吟庭草仕優味架篇  
更咨文苑駁務糾墨程偏訂約諸生僑期占每月圓

授餐扃署課監案就批編來去疏題脈節章究旨躔  
剗浮摹古藻刊腐繪新妍諄辨辭神貌詳區義腹弦  
頻邀優錄獎罔惜累旌捐僻塾知歸徑迷津醒渡船  
猶虞山水鈍或抑鳳鸞仙倡復文峰塔對森錫岫巔  
霽霄凌漢矗陰雨刺雲穿培補川原闕裁成璞玉全  
午科雖負望嗣榜應聯翩遏暴冰壺裏作人玉尺前  
九重寄保赤四載慰懷鮮展蘊疇經朔輸忠報國先  
清標慚謗綬循蹟譜歌絃廣譽鬻鄰嘖令聞溢上銓  
西陵調展驥上雋歎飛鳶來伏魯恭雉去辭劉寵錢

# 通城縣志

卷十八

藝文詩

八

攀轅號異懦卧轍泣危顛瀉水民何福銀山命忽遄  
芻蕘猶有獻河海不遺涓赤縣雖文藪巖疆却猾淵  
巨憇籌訟慣詭蠹舞文沿謀密麤難覺機潛淺被弮  
南濤江納垢北岨豫毗邊草竊嘗輕法蔓滋漬廣延  
枵腸攪粥粟流體攬襦綿免窟營幽壤狐城吸盜泉  
渾資初折脆莫待久攻堅鬪奪風彌熾奇袞術更羶  
因循階厲恣姑息釀癰纏火烈調濡水驍狂伏楚鞭  
髀臄游刃澀盤錯利鋒鑄匪懈防微漸用中刷絳牽  
入鄉先問俗因地更斟權暫輟書淫素備營政最專

牛刀磨再試鳳羽翮超遷愚歛贈言也幸垂採鑒焉

登銀山偶咏

邑廩 聶 森

銀山頂上四徘徊豁我襟期眼界開一縷濃煙穿石  
髮半村疎雨洗松鬢層巒矗矗雲初起遠水溶溶暈  
自來翹首却疑霄漢近欲攀塔杪上三台

黃鶴山懷古

邑庠 周德揚

羽客有何戀而來憩此邱宿蘿縈永竈叢棘翳丹樓  
雲隱仙俱隱山留鶴未留盱眸凝碧落野馬騁悠悠

登黃龍山

周大乾

通城縣志

卷十八

藝文詩

九

吳楚矗雲分嶙峋不易登半腰低樹嘯絕頂遠煙騰  
碧沼涵鮮鯉丹爐灼古藤仙翁何處去含笑問山僧

雋城懷古

邑舉 程盛泮

上雋何由改作州爲時南北轉相讎江陵旣不思興  
楚湘沔行看盡入周百戰嬰城覘守力十年破賊顯  
神謀將軍父子今雖去猶記成功屬此邱

邑志成贈吳孝廉公峩峙

舉人 程盛泮

七十年來守性眞先生於我實同人是非不掩唐書  
范隱顯互陳漢紀苟漫計闡文傳海甸且看手教重

鄉鄰今成此志還何事一棹煙濤入富春

明倫堂落成

教諭

張士樞

擢秀掄英聚此堂千秋大業振宮牆人嗤晉代風流  
格士戒南朝脂粉妝根柢文章卑屈宋淵源道脈溯  
羲皇鵞湖鹿洞無多旨謹守彝倫教澤長

銀山積翠

邑貢士

吳芳綬

銀蒼

嶂列銀屏大蘊涵巍然聳峙貢奇嵐曙煙冪靄青雲  
幔夜月披揮碧玉函影倒長河疑染黛光聯列岫儘  
浮藍頓教雨過初晴曉灑滿綠油暈更酣

# 通城縣志

卷十八

藝文詩

十

登相師山

邑庠

章忠烈

相師削劣聳蒼穹極目寰區一望空萬縷煙光騰足  
下幾層雲氣盪胸中洞庭遠矚南蛟穴衡嶽平臨北  
斗宮畢竟滿山多紺石須知留此記黃公

黃龍山

邑國學

葛行琥

隱隱隆隆氣象雄雲連霧起接蒼穹千巖競秀煙霞  
外萬壑爭流礪石中幕阜分陪風冉冉湫池應禱雨  
濛濛洞天勝境多竒異跨有三州探不窮

柳林閒居分寄弟明珍明玠

邑廩

徐士昇

南北相思春復春宦途何似聚鄉鄰無羈歎段行原  
坂不繫漁舟在水濱月光窺村酒甕和風影動釣  
絲綸養成鶴頂歸來早同作花前笑語人

忠廟懷古

邑庠 方剛

廟建鷄鳴祀已崇非徒血食倚巒宮當年祇了勤王  
事異世難忘戮力功一片丹心懸皦日千秋浩氣貫  
長虹迴思烈祖勲垂宋聞見時存優愾中

尖山登覽

歲貢 胡世鵬

山形四出絕攀援斗覺峰高穎獨存左擁清流依北

## 通城縣志

卷十八 藝文詩十一

港右環秀水接東源何年甘井澄荒寺此日雷坡屬  
故園自古人才鍾地氣還當生發顯中原

黃大石

上有仙人足跡  
下溪繞堆山出

廩庠 雷驚春

盤石何年踞此隈憑誰姓字浪傳來昔人已遠幽芳  
草遺跡猶存印古苔漫擬摩笄標苦節想因墮履鍊  
奇才堆山指顧峯迴鎖一曲溪流去不回

早春遊九嶺

熊勝第三及

九嶺巍巍勢及天葱葱雲樹滿巖前寺門經過逢僧  
話石壁敲詩倩鳥傳左右溪聲流不盡去來人事渺

無緣尋芳直踏梅花畔不是王維畫不全

扃試諸生示勉

二首

邑侯

蔣

澐

秋舫

飛來鳧舄又三年結習依然手一編豈有絃歌新雅  
化只尋文字舊因緣詞源好濯邱遲錦藝圃誰先祖  
逃鞭桃李門庭花爛熳河汾弟子話薪傳

一點靈臺判聖狂士先氣節後文章梅花有骨何嫌  
淡蘭草無人也自芳舊物青氍王大令好辭黃絹蔡  
中郎琴堂抵作書堂坐衙鼓聲終已夕陽

蔣侯癸未孟夏檄調省垣通邑士民沿途飲餞

## 通城縣志

卷十八

藝文詩十二

侯賦詩誌別

四首

蔣澐

宦海從來處處波早思拂袖卧煙蘿算緡可柰催科  
拙投匭頻警告許多讀律未精難入格貢諛無術自  
離羅窮通漫向君平卜偷得閒身且放歌

驪歌聲裏按青羌檢點琴書便束裝難得孟嘗來合  
浦敢云朱邑嗣桐鄉鮒魚涸轍身原因鷹隼離縑氣  
自揚猶有壯心消未盡蕭蕭華髮漸成霜

瀕行未免步遲遲載舊情深有所思桃李尙勞春管  
領耕桑也要雨扶持村中犬吠驚眠夜井底蛙張肆

毒時愁愧惠民無一事聊將民隱播新詩

祖帳交衢結綺筵去官倍覺意纏綿壺觴父老懷今  
日竹馬兒童憶昔年九轉腸中悲聚散一彈指頃證  
因緣登場傀儡原無定只是當前總惘然

### 咏五指山

邑舉人 吳壽平 格齋

京師五指山上有觀音閣上巳日諸詞翰吟  
集限飛字韻格齋至命以詩立就至今石刻  
尙存

得得尋芳上翠微懸巖斜插掛晴暉山腰橫出仙人

## 通城縣志

卷十八 藝文詩十三

掌擎住浮雲不敢飛

### 登岱

吳壽平

秦松漢柏枝逾古玉檢金泥跡浪傳七十二君何處  
問雲亭山上草如煙

### 八景

邑庠 羅萬河 天崑

翠積橫天半瀾迴入海東耕春鶯轉曙誦夜鶴嘲風  
月映茶煙裊雲穿墨浪融曉鐘連暮鼓黎獻樂時雍

### 前題

邑庠 徐管

八景天排氣象雄雋溪秀水繞城東銀山靜擁郊原

綠雁塔高瞻海日紅漏盡聞鐘常朗朗月殘撾鼓亦  
逢逢太平世界還何事涵煦春耕夜誦中

過銀山石塢四賢祠

邑貢 黎正輝 秀倫

銀山之麓新祠新別墅尤欣得古鄰眉案歡斟彭澤  
酒裘灘兼脫嶺潮塵一竿竟是隋唐水五柳還留漢  
晉春收得乾坤風月在年年磯上釣漁人

遊相師山

劉興治 晃甸

穩步相師絕頂遊孤巔矗出白雲頭香龕草繡留名  
蹟石柱苔封現古邱低壓銀山連靄嶂遙臨雋水露

## 通城縣志

卷十八 藝文詩十四

汀洲追懷圯上傳書事漢業韓仇蘊此收

蒞任江南潛山

邑進士 吳冀泰 竹屏

潛邑向有怪獸噬人下車初忽然斂跡邑以  
爲善政之感羣相禱祝因自記云

墨綬銅章筮仕初多慚竹馬奉單車差無魯政苛如  
虎那有韓文徙及魚九鼎神奸消大澤一朝歌頌滿  
穹廬從茲共享承平福康樂和親早上書

登四腳嶺 二首

司訓 盧殿才 兼三

石棧天梯斷復連肩輿添纜倩人牽俯窺谷口疑無

地遠上峰頭只有天疊嶂從何分起伏磨崖亦太費  
雕鐫一聲長嘯振林木宿鳥驚飛到日邊  
重重關鎖接岩堯咫尺靈光萬嶂朝窘步不堪逢窄  
徑閒身何事近層霄人來絕頂高於樹雲出前峯湧  
似潮惆悵斜陽催客去歌聲一路聽歸樵

過蓮花瓣

汙泥不染是蓮花瓣瓣凌空浸曉霞水瀉銀塘千頃  
潤山橫錦帳四圍遮中峰特起搖浮翠餘氣平鋪發  
嫩芽采采有情看不厭由來品地重清華

通城縣志

卷十八

藝文詩十五

遊百丈潭 二首

百丈潭邊匹練浮飛奔直下碧峯頭危嵯陡劈仍分  
峙恠石橫遮不斷流地脈能通山澤氣襟懷共滌古  
今愁傳聞靈境多竒異土人言潭內時有怪物出沒常作甘霖應  
禱求

匡廬風景望中收也學蘭亭禊事修曾記故人邀舊

侶前捕廉周麗甫邀此地事冗未果喜逢新霽續前游良辰結伴簪

皆盍小住隨緣轄任投近潭諸紳欸留信宿爲語名山招卽至

莫教風雨故淹留

弔李晴舫司馬

諱景湖

卹加知府銜

教諭

鍾壽朋

菊潭

本是翩翩玉局姿從戎慷慨棄毛錐滿腔熱血三年

灑計甲寅至丙辰

半世忠魂萬古悲烈士不妨軀命擲儒生

偏奏戰功奇

曾克復蒲圻協復武昌

一時氣節千秋史介冑紛

騰起壯思

天狼誓射赴東南一蹶孤軍覆不堪

皖界陣亡

起舞鷄聲

虛素志裹尸馬革信奇男逆氛到眼生羞並義憤橫

胸死亦甘料得九原靈爽慰祀祠蔭後

# 通城縣志

卷十八

藝文詩十六

聖恩覃